

# 關愛的故事



## 跨境養老

我老公姓許，已經七十幾歲，喺香港住咗幾十年，早十幾年前先返嚟開平娶咗我做老婆。佢喺香港係攤開綜援嘅，有時都會返嚟開平住吓，因為生活指數低啲，無香港啲嘢咁貴，本來兩個慳啲使，勉強強強都可以過活。

不過，因為領取綜援唔可以長期離開香港太耐，佢唯有香港、開平兩便走，真係好辛苦。唉，好景不常，幾年前佢仲患咗老年癡呆症，出咗門，都已經唔識返屋企。佢喺香港又無人無物，都唔知點樣照顧佢好囉。

好在有同鄉介紹，先識得搵社工幫手，申請「綜援長者廣東及福建省養老計劃」，等佢可以返嚟廣東開平養老。個計劃俾啲選擇到廣東或者到福建省養老嘅綜援長者申請，如果係香港永久居民，喺香港居住最少七年；年齡六十歲或以上；以及喺申請前已連續領取綜援金最少一年，就有資格申請。

我老公就啱晒條件，佢除咗可以繼續每月領取綜援之外，每年仲有一次過嘅長期個案補助金，不過，就無晒其他特別津貼同援助金，好似租金津貼、特別膳食津貼、交通費用津貼等。不過，都無所謂啦，至緊要一家團聚，佢而家有我照顧，生活安定，精神都好好多。

我都會介紹其他長者申請呢個「綜援長者廣東及福建省養老計劃」，等佢地都可以喺鄉下養老，有家人或者鄉里照顧，安享晚年。

(494 字)